

禮

記

通

解

禮記通解

京山郝敬著 男千秋千石校刻

讀禮記

禮家言雜而多端學者須靈鏡獨照然後可以觀古人陳蹟苟無高明豁達之見耳食訓詁隨人短長則逐處成滯矣

是書漢儒戴聖所記多先聖格言七十子門人後裔轉相傳述非出一手如中庸子思所作緇衣公孫尼子所撰月令呂不韋所脩王制漢文帝時博士所錄三年問荀卿所著真贗相襲而瑕不掩瑜先儒推周

禮儀禮以爲經欲割記以爲傳夫三書皆非古之完
璧而周禮尤多揣摩雜以亂世陰謀富強之術儀禮
枝葉繁瑣未甚切日用惟此多名理微言天命人性
易簡之旨聖賢仁義中正之道往往而在如大學中
庸兩篇豈周官儀禮所有故三禮以記爲正今之學
官守此程士良有以也

禮非夫子原定之書矣後儒各記所聞互相矛盾達
觀者自能折衷有所不知宜存而弗論牽強附合失
之愈遠如王制云公侯國方百里伯七十里子男五
十里而周禮云公五百里侯四百里伯三百里子二

百里男百里。王制云：天子三公九卿以下至元士百二十人。而周禮官職多至三百六十。其人不可勝數也。王制云：次國三卿。一命于其君。小國三卿。皆命于其君。而周禮云：諸侯之卿大夫士皆命自天子。月令封諸侯以孟夏。而祭統云：出田邑以秋。雜記云：公圭九寸。侯伯圭七寸。子男圭五寸。而周禮云：子執穀璧。男執蒲璧。聘記云：諸侯朝天子。圭纁皆九寸。三采諸侯圭纁皆八寸。二采。而周禮大宗伯考工記皆云：天子諸侯圭璧長短各以等差。禮器云：天子堂九尺。而考工記云：堂崇三尺。王制云：諸侯於天子五年一朝。

又云天子與諸侯相見曰朝而周禮大宗伯云春曰朝夏曰宗秋曰覲冬曰遇然儀禮惟有覲禮無所謂朝宗遇而大行人又有九服分六歲來朝之說禮器云天子席五重諸侯席三重周禮司几筵職云天子席三重諸侯再重周禮典命禮儀各視其命數天子大夫四命四牢而檀弓云大夫遣車五乘諸侯之卿大夫與天子之卿大夫命數異而廟制與相見之贊小斂之衣几筵之席諸侯與天子卿大夫士又無別曲禮王制月令皆云五祀唯大夫祭之周禮亦云五祀而祭法云王立七祀諸侯五祀大夫三祀士二祀

庶人一祀。王制天子七廟。或又云九廟。士二廟。又云士一廟。祭法自天子至于士。廟外各有壇壝。而王制但有五七等數。無壇壝。王制祭統皆云夏祭曰禘。郊特牲祭義云春禘。明堂位云季夏六月禘。雜記又云七月禘。然則禘常祭耳。而喪服小記大傳皆云王者禘其祖之所自出。不王不禘。祭法天子泰壇。地于泰。坎。周禮園丘方澤。樂舞玉帛。天地各異。是祭天與地分也。而詩周頌昊天有成命一詩。爲祀天地之樂。則是祭天地合也。祭義云郊之祭。大報天而主日。以月醜。是祭日月與天合也。而祭法又云祭日月星與四

時水旱同郊用犢日月用少牢。周禮亦云禋祀昊天上帝實柴祭日月星辰則是祭日月與天又分也。月令仲夏大雩于上帝是五月也。而春秋傳云龍見而雩則是四月也。郊特牲云郊用騂尚赤而周禮大宗伯以蒼璧祀天其牲各倣其器之色是郊牲又用蒼也。祭法天地皆騂犢而周禮陽祀騂牲陰祀黝牲是地牲又不用騂用黑也。曲禮云大饗不卜表記亦云大事有時而周禮大宰祀五帝卜日祀大神祇亦如之是又無時也。郊特牲云郊用辛而月令云擇元日是又定于辛也。社用甲日而月令仲春擇元日命

民社。周書召誥社以戌日。是又不定于甲也。曲禮大
夫祭以索牛。而儀禮大夫祭則少牢也。中庸云。上祀
先公以天子之禮。而周禮司服云。祀先公用毳冕。則
是以侯禮也。雜記云。士弁而祭于公。冠而祭于已。而
論語云。宗廟之事。端章甫爲小相。章甫冠名。是祭于
公亦冠也。王藻以玄冠爲齋冠。玄端爲天子燕居。諸
侯之祭服。而士冠昏。與卿大夫聘享。上下通用玄冠
玄端。周禮冕衣裳五等。皆祭服。而曾子問云。冕而親
迎。樂記云。魏文侯端冕聽鼓瑟。則是冕亦衣端也。周
書顧命。成王康王臨朝。君臣皆冕服。則是冕服不止

祭也。禮器云。天子龍袞。諸侯黼。士玄衣纁裳。而周禮云。侯伯鷩冕。子男毳冕。孤希冕。大夫玄冕。士皮弁服。王藻云。國君帶朱綠。大夫玄華。士緇。故士冠禮三加。帶皆緇。而雜記又云。諸侯大夫帶皆五采。士二采。祭義云。君用玄冕。夫人用副。禕而周禮又云。王后用副。禕。喪大記云。復衣不以衣尸。不以斂。而士喪禮又云。以衣尸。喪大記云。士小斂。陳衣于房。西領北上。大斂。陳衣于序東。西領南上。而士喪禮云。大小斂皆陳衣于房。皆南領西上。周禮云。天子舍用玉。而雜記云。用貝。喪大記云。君于大夫疾。三問之。而雜記云。卿大夫

疾。君問無算。喪大記云。公之喪。大夫俟練而歸。士卒
哭而歸。雜記云。大夫次于公館。以終喪。士練而歸。奔
喪云。大功望門而哭。齊衰望鄉而哭。雜記又云。聞兄
第之喪。大功以上見喪者之鄉而哭。士喪禮。小斂朔
奠。皆陳鼎。遣奠陳五鼎。皆具牲牢。周禮。牛人亦云。也。
事共奠牛。而雜記有子以遣車視牢。具載。糗爲非。
喪奠脯醢而已。喪大記云。四鄰賓客弔。其君後主。
而拜。蓋君爲臣主。君拜則主人拜其後。而曾子問又
云。衛靈公弔季桓子之喪。哀公爲主拜。季康子亦拜。
孔子謂喪有二孤。季康子之過。則後拜又非也。曾子

問云金革之事無避也者。伯禽有爲爲之喪。大記又云。既卒哭。弁經帶。金革之事無避也。曾子問云。慈母無服。儀禮又云。慈母如母服。檀弓云。天子之哭。諸侯也。爵弁經緇衣。而周禮又云。天子爲諸侯。總衰。檀弓云。祥而縞。是月禫。徙月樂。則是祥之月不作樂。而又云。孔子既祥。彈琴十日而成笙歌。雜記云。柩用桑。儀禮特牲又云。柩用棘。郊特牲云。鼎俎奇而籩豆偶。鄉飲酒義云。六十者二豆。八十者五豆。是豆亦奇也。檀弓云。孔子惡野哭者。又云。孔子哭伯高曰。吾哭諸野。曲禮云。卜筮不相襲。而周禮又云。大事先筮。後卜。王

藻云天子日食少牢。月朔大牢。而周禮又云王日一舉。是日食亦大牢也。射義云天子歌騶虞。周禮亦然。而儀禮鄉射亦歌騶虞。是士庶人與天子同樂也。周禮司射云王射六耦。三侯。儀禮大射諸侯三耦。射三侯。周禮王虎。熊。豹。侯。諸侯熊。豹。侯。卿大夫麋。侯。而鄉射記又云天子熊。侯。白質。諸侯麋。侯。赤質。大夫士布。侯。畫。虎。豹。鹿。豕。如此之類。錯雜紛拏。師說相承。言人。人。殊。雖使考證詳確。古今異宜。亦難盡用。而鄭康成輩好信不通。執此徵彼。及其不合。牽強穿鑿。講張百出。初學爲所眩惑。隨聲應和。莫知其烏。世儒所以苦。

于讀禮也

先儒以大學中庸兩篇爲道學之要。別爲二書。夫禮與道非二物也。禮者道之匡郭。道無垠堦。禮有範圍。故德莫大于仁。而教莫先于禮。聖教約禮爲要。復禮爲仁。禮儀三百。威儀三千。致中和。天地位。萬物育。此道之至極。而禮之大全也。故曰卽事之治。謂之禮冠。昏喪祭禮之小數耳。子曰民可使由之。不可使知之。世儒見不越凡民。執小數。遺大體。守糟魄。而忘菁華。如曲禮王制內。則王藻雜記。則以爲禮。如大學中庸。則以爲道。過爲分疏。支離割裂。非先聖所以教人博。

文約禮之意。自二篇孤行。則道爲空虛而無實地。四
十篇別列。則禮似枯瘁而無根柢。所當亟還舊觀
者也。說詳本篇。

繁文瑣節。聖人所以教人。斯須不去者。不專在此。故
雅言執禮。而至其論禮。則曰寧儉寧固。曰禮云禮云。
玉帛云乎。三千三百。惟曰約之以禮。林放一問。及本
則欣然大之。其易簡真切如此。若夫論語鄉黨篇所
記。皆聖人從心不踰之矩。非古有陳迹。硜硜模倣爲
之也。而當世人見謂聖人一步一趨。皆有格局。得自
好古。以晏平仲之智。亦曰孔丘學禮。當年不能殫累。

世不能究。謂問禮于老聃。學禮于郊子。是以禮爲格。套。聖人習而知之。豈達禮之本者哉。據記所稱好禮諸賢。莫如曾子。子游。子夏。子張。子夏。拘拘。故論交曰。可者與之。其不可者拒之。至聞素絢之教。則知禮爲後。其言曰。大德不踰閑。小德出入可也。子張論士曰。喪思哀。祭思敬。其可已矣。子游論喪曰。致乎哀而止。其論學曰。洒掃應對進退。抑末矣。本之則無如之何。曾子用功于容貌。辭氣。夫子曉以一言。遂悟忠恕顏子。仰鑽。夫子約之以禮。博之以文。夫禮至博也。而曰博文。可知博。乃是文。禮非約也。而曰約。禮可知約。乃

是禮。此聖門學禮明法。學者所當默識也。

禮以節人情。非遠于人情也。人情樂簡便而趨驕惰。不防檢則淪于禽獸。故不得不以禮節之。若遂強之。以其所難。而盡易其所安。辛苦勞頓。將并其所謂節者棄之。故聖人制禮。從容和順。使人安常樂就。如出入由戶。舍之不能。故曰先王之道。斯爲美。小大由之。有如曲禮雜記諸篇之煩瑣。則雖日撻而求。人豈從之。故人皆知放佚驕惰之非禮。而不知牽強煩瑣者之害禮也。

凡禮不可常行者。非禮之經。用于古。不宜于今。而猶

著之于篇。非聖人立經之意。卽四十九篇中所載。如
俎豆席地。袒衣行禮。書名用方策。人死三日斂之類。
古人用之。今未宜。父在爲母期。出母無服。師喪無服。
此等雖古近薄。父母爲子斬衰。妻與母同服。此等失
倫。官士不得廟事祖。支子不祭。此等非人情。杖不杖。
視尊卑貴賤。哭死爲位于外。熬穀與魚腊置柩旁。此
等近迂濶。國君饗賓。夫人出交爵。命婦入公宮養子。
國君夫人入臣子家弔喪。此等犯嫌疑。祭祀用子弟
爲尸。使父兄羅拜。若祫祭。則諸孫濟濟一堂。爲鬼。此
等近戲謔。人死舍珠玉。以誨盜。壙中藏甕甗。管衛等

器歲久腐敗。陷爲坑谷。此等無益有害。古人每事不
忘本。酒尚玄冠。服用皮食。則祭。至于宗族姓氏。則隨
便改易。如司徒司空韓氏趙氏。惟官惟地。數世之後。
迷其祖姓。又何其無重本之思也。廟制天子至士庶。
有定數。皆有堂有寢有室有門。大邑巨家父子世官。
兄弟同朝。將廟不多于民居乎。如云皆設于宗子家。
則宗子家無地可容。如父爲大夫子爲士。庶則廟又
當改毀。倏興倏廢。祖考席不暇煖。適子繼體。分固當
尊。至于抑庶之法。亦似太偏。喪服有等。不得不殺。至
于三殤之辨。亦覺太瑣。衰麻有數。不得不異。至于麻

葛之易亦覺太煩。天子選士觀德用射。射中得爲諸侯。不中不得爲諸侯。如此之類。雖古禮乎。烏可用也。故凡禮非一世一端可盡。古帝王不相沿襲。聖人言禮不及器數。惟曰義以爲質。有以也。此四十九篇大都先賢傳聞。後儒補緝。非盡先聖之舊。而鄭康成信以爲仲尼手澤。遇文義難通。則稱竹簡爛脫。顛倒其序。根據無實。則推殷夏異世。逃遁其說。節目不合。則游移于大夫士庶之間。左右兩可。解釋不得。則託爲殊方語音。變換其文。牽強穿鑿。殊乖本初。蓋鄭以記爲經。旣不敢矯記之非。世儒又以鄭爲知禮。不敢議

鄭之失千餘年來所以卒賢賢然耳昔者老聃爲周
藏史夫子果從之問禮乎則知禮莫如老聃矣而其
言禮則曰忠信之薄何自毀其學與佛子罵佛自是
一重公案故夫子曰老子猶龍世儒以老氏言忽之
至鄭康成銖銖兩兩則曰知禮此夫子所謂飛者吾
知其爲鳥也

禮不根情則枯槁而無生意故聖人言禮不貴文貴
情行禮不貴禮貴義如親喪不飲酒食肉禮也飲酒
不樂食肉不甘情也先王因人有是心制是禮而人
本是心行是禮心安理順則中節而和斯謂之禮今

禮記卷之九
之行禮者。但言不飲酒不食肉之文。更不問不飲酒不食肉之心。雖貪饕及頤之夫。能忍不飲食。卽謂知禮。毀行敗節者。三日水漿不入口。皆稱曾參。嗟夫。是烏得爲禮乎。

世儒謂禮經未全亡。而樂經亡矣。此市兒語也。夫禮樂非二物。禮樂偕亡。天下後世何緣復得見禮樂哉。今之禮樂。由古之禮樂。非自天降地出。皆聖人之教也。故曰禮云禮云。玉帛云乎。樂云樂云。鐘鼓云乎。世儒惟以禮樂爲玉帛鐘鼓。求其數而不詳。故謂禮樂亡。至欲引儀禮周禮爲經。屈記爲傳。夫記爲傳。猶可。

而周禮儀禮。烏可以爲經乎。萬世常行之謂經。二禮不行于天下。後世今十且九矣。二禮詳于器。而記詳于義。義可兼器。器不可兼義。如以義耳。寧獨記易詩書春秋。何經無禮樂四十九篇。大經小曲。何器不備。器者隨時變通。而義者百世不易。故夫子言禮曰。殷因於夏。周因於殷。所損益可知。其言樂曰。始作翕如。從之純如。皦如。繹如。以成樂。其可知。必如周禮官職儀禮節文。而後爲禮樂。則聖人宜取鐘鼓管籥。綸絲比竹。各定爲一法。編爲一書。又取儀禮所不備者。如天子諸侯及大夫士升降坐立拜起服食器用各定。

爲一法編爲一書。謂之經而後謂之禮樂存。如此不
惟時勢古今。跌戾難行。且多如牛毛。繭絲委瑣。煩複
六經有此體裁。不故夫三禮自達人觀之。亦已詳矣。
猶謂之禮殘樂亡。愚故曰市兒語也。

禮者物之則。詩云有物有則。物之類萬而物皆備。萬
何止千百。故曰三千三百。甚言多耳。非謂先王定三
千三百爲數。限人必由也。鄭康成解禮。求合此數。以
周官三百六十爲經。禮三百儀禮十七篇爲曲禮三
千。其不足三千者。謂之逸禮。所謂癡人說夢也。

鄭康成解禮多強作。俗士詫爲辯博。小有異同。輒云

學問未到康成地焉敢高聲議漢儒夫議論前人長短非也議論前人所議論道理文字何傷今據四十九篇中解說謬者畧舉之曲禮曰葱淥處末淥與淥通作泄易井卦九三云井渫不食古字借作屑內則云屑薑與桂士喪禮云麇三醯醢屑是也鄭云淥蒸葱也又國中以策葶卹勿驅本謂車行城中宜垂策緩步以策末拊卹其馬勿使疾驅鄭以勿字屬上讀解云卹勿搔摩也檀弓曰公儀仲子之喪檀弓免焉凡免冠而加布于首曰免與紼通自五服以至朋友新喪皆紼禮也而鄭解云檀弓故爲非禮以諷仲子

之廢適凡免冠之免讀如字加布焉曰纒通作冕與
免同而義異故喪服小記曰爲母免而以布然則爲
父免而不以布免冠而已以布則加纒也鄭于凡免
皆混作纒解又宋敗魯師于乘丘公御縣賁父死死
者御一人耳鄭謂與車右同死而誤以上國之卜爲
人姓又謂申詳爲子張之子而無據解云顧孫申詳
周秦聲相近也又曾子弔于負夏主人旣沮填池反
柩本謂填起柩前柳池使見棺行程也鄭變填池作
徹奠又魯哀公諱孔子曰嗚呼哀哉尼父魯地有尼
丘故孔子以尼字丘蓋呼其字哭也鄭謂以尼諡之

又未仕者不敢稅人。稅作祝。襚同。贈死衣服曰襚。未仕則衣服不備。故不敢襚人。鄭謂稅以物遺人也。又國君七介。遣車七乘。大夫五介。遣車五乘。古字介介通。禮器云。諸侯七介。七牢。大夫五介。五牢。周禮諸侯貳車七乘。介七人。故雜記云。遣車視牢具。謂送葬之車。視死者命數爲多寡。鄭以介爲遣奠。包牲體之數。以遣車爲塗車。納之壙中者也。又國昭子謂于張曰。噫。母曰我喪也。沾爾專之母。戒辭沾爾自用貌。言勿謂我之喪。我沾然自專主也。鄭讀噫母爲句。我喪也。斯沾爲句。謂沾當作覘。又歌斯猶猶合也。凡歌必有

節以合之。如今人唱則拍板拊手之類。鄭謂猶作搖。未聞有歌而搖者。又季康子母死。公輸若方小。斂般請以機封。般公輸若名。稱般者自請之辭。若方與小斂。因自請他日葬。已爲機以封。不用碑。繹也。鄭以公輸若般爲兩人。以方小爲句。謂若爲匠師。年幼般爲若族人。掌窆事也。又諸侯輜而設幃。爲榆沈。故設撥。爲讀去聲。榆木名。物重曰沈。撥與縹音義通。謂諸侯以榆木爲柩車。榆性沈重難行。風俗通曰。桑車榆轂。聞聲數里。故設縹以引之。鄭云。以水澆榆白皮。汁播地引車也。又高柴葬妻。犯人之禾。申詳請庚。不許曰。

後難繼。此正識治體者。而鄭以爲恃寵虐民。又晉獻文子成室。晉大夫發焉。獻文趙武諡也。發猶落也。始新之名。而鄭解獻賀也。發發禮往也。王制冬祀行。行亦謂之井。孟子云井上有李。謂道上有李樹也。古者井地井間爲道。道間有水。卽所謂行潦也。冬水用事。故祭行卽是祭井。鄭謂冬陰盛寒於水。祀之于行。從辟除之類。則是以行爲土也。禮運云蕒桴而土鼓。蕒與塊通。合泥草爲鼓。推也。土曰塊。草曰蕒。論語曰。譬如爲山。方覆一簣。蕒與蕒通。猶塊也。又荷蕒過孔氏之門。農家荷土者也。喪禮寢告枕塊。草土同類。故孟

子言...
子曰不知其足而爲屨我知其不爲蕢古蕢塊通而
鄭解云蕢讀爲塊聲之誤也又禮器如竹箭之有筠
筠竹節也竹節均故曰筠言人外有禮以爲節也鄭
于尚書顧命敷重筍席註云筍析竹青皮禮記曰如
竹箭之有筠是以筠爲青皮以箭爲筍也又天子諸
侯廢禁大夫士枌禁承酒尊之器曰禁無足曰廢士
喪禮浴尸設廢敦亦謂無足之敦也士虞禮有廢爵
有足爵論語曰中道而廢亦無足之義枌與與通形
似車箱有足故高廢禁無足故下所謂以下爲貴也
而鄭謂廢禁爲不用禁枌禁爲無足又犧尊本謂尊

上畫犧牛之形。鄭云：犧作娑，畫鳳羽于尊上，娑娑然也。又周坐尸，詔侑武方，本謂周禮爲尸者坐而祝與佐食，詔告勸侑，其步武進退皆有方法。而鄭解武作無，禮器云：壘尊在阼，犧象在西，君在阼，夫人在房。按廟制有東房，無西房，故祭統亦云：君純冕立于阼，夫人副褱立于東房，尊在房戶之外。壘犧二尊并列，壘東犧西，以西爲上，神席在室西，故也。鄭謂人君尊東，天子諸侯有左右房，謂夫人在西房也。郊特牲：鄉人禘，本謂鄉人大儺，袒禘相逐，而鄭解禘作禘，強鬼也。又縮酌用茅明酌也，醖酒沉于清汁，獻沉于醖酒。

猶明清與酸酒干舊澤之酒本謂以茅泝醴盛于酸和之以水加鬱汁以獻如今人以水和飲陳酒之類鄭援周禮謂明酌爲事酒酸酒爲盎齊清爲清酒汁獻作汁莎舊澤本謂舊酒釀厚如膏澤也鄭變澤作醴內則云男子入內不嘯感口出聲曰嘯凡隱事相號則嘯故盜黨嘯聚鄭變嘯作叱又內則世子生告于君接以大牢本謂世子見君君具大牢饗諸臣而鄭變接作捷謂食其母補虛強氣也又男鞶革女鞶絲鞶大帶也鄭謂鞶爲小囊未聞古男子皆佩皮囊也又年不順成君摺本古者執竹簡記事曰笏笏本

竹也。後世易以玉象，故謂竹筴爲本，鄭以筴下爲本也。玉藻曰：諸侯筴荼，荼，葦茗也。和柔之意，謂諸侯之筴上剡而挫其角，如荼然。與天子挺直異。鄭因古荼字有通作舒者，遂變荼爲舒。以附會考工記玉人大圭杼上之杼，云天子之筴舒上爲椎頭，諸侯舒上無椎頭也。又侍坐必退席，引而去君之黨，猶側也。謂不敢迫近君側，猶鄉射禮云：乏居侯黨之黨，而鄭謂黨爲鄉之細者，避君親黨也。又侍食君未覆手，不敢殮食，畢放箸曰覆手。古人飯以手，食必仰其手，食終則覆手。鄭謂以手循口旁餘食也。又親沒不髦，謂立

十者始衰遇親喪不髦頭也鄭云去為子之飾又大
 帛不綫古冠小而撮髮以緇布為之周始為委貌大
 冠以玄帛為之故曰大帛衛文公大布之衣大帛之
 冠是也鄭據雜記大白冠謂以白布為冠又裘之裼
 也見美服之襲也充美皮上用單帛為裘曰裼裘外
 加重衣曰襲鄭云裘之外有裼衣裼衣外有襲衣又
 尸襲本謂始死之尸重衣斂襲鄭以為祭祀之尸尊
 襲衣充美也又笏畢用也畢即簡君前用笏當簡記
 事鄭作畫訓笏本竹簡鄭作珪訓喪服小記云士祔
 于大夫則易牲本謂孫為士者祔于祖為大夫者之

廟則祖用少牢而孫用特牲。廟可祔而牲不可襲。故曰易牲。鄭云不以卑牲祭尊則是並用少牢也。大傳云同姓百世昏姻不通者。周道然也。周道猶言大道。鄭解爲周禮然則夏商禮有同姓爲昏者與。少儀云不貳問。謂人隱而不答不可再問。鄭解謂問卜不可貳其心也。又車不雕幾。幾細微也。雕刻爲細文。鄭解幾爲圻鄂。又枕几。穎杖刀卻刃。授穎。櫛謂之穎。鄭以穎杖之穎爲警枕。授穎之穎爲刀環。樂記云敦和率神。便宜居鬼。本謂樂從陽。禮從陰。鄭謂聖人死爲神。賢人死爲鬼。學記云足以謏聞。謏誅誘也。與搜通。獵

譽也。鄭作小。又赴辭使某實實信也。使謂之信。鄭作至。雜記復夫人以狄衣素沙。沙紗通。薄繒也。婦人盛服外籠素紗單衣。詩云。其之展也。蒙彼絢繡。又云。衣錦褻衣。士昏禮加景是也。鄭謂六服以素紗爲裏。又大夫不揄絞。絞編通。單繒也。鄭謂絞爲青黃色。又士練而歸。士次于公館。大夫居廬。士居聖室。本謂哀次。輕重先後。鄭以聖室士爲邑宰。公館士爲朝士。又大夫卜筮宅葬日。公私皆有有司占者。史而服異。又卒哭諱。王父母兄弟世叔父姑姊妹子與父同諱。鄭皆不解。而曲爲說。又小斂環經。公大夫士一本謂弔者。

視小斂之服卽所謂玄冠者易之而已也。鄭以環絰爲孝子。喪大記云。未小斂。主人出。徒跣扱衽不冠。曰。徒不履。曰。跣。凡罪人髡髮。則免冠。周禮司圜職云。害人者弗使冠飾。而加明刑。任之以事。而收教之。故不冠。謂之徒。卽所謂笄纒也。鄭謂親始死素冠。是未識徒爲不冠也。又主人袒脫髦。髦與毛通。亂髮蓬首。如今人脫去網巾。是也。鄭以髦爲人子事親之飾。又子大夫公子衆士食粥。納財朝一溢米。莫一溢米。納進食也。財與纒通。猶僅也。溢與搯通。一手所握曰搯。言朝夕僅進米一搯耳。鄭訓財穀也。二十兩曰溢。又紿

無統統組屬所以束也。紵單被也。大斂外有紵故紵不用組。鄭解爲被上之識。又祥而外無哭者。禫而內無哭者。其間哀止。卽閒傳所謂中月而禫。鄭云大祥門外不哭。禫則門內不哭也。祭法云相近于坎壇。本謂四時寒暑日月星水旱六宗之祭。與天之泰壇地之泰坎相近。鄭解相近二字作禳祈表記云。禴襲不相因。凡去衣曰袒。單衣曰禴。重衣曰襲。禴襲不止衣服。凡執龜玉重器皆有禴襲。單藉爲禴。重裏爲襲。鄭謂執王者衣裘。倏禴倏襲也。又唯卜之日稱二君。謂人臣筮仕則稱兩君。擇其所事。非是則君不稱二鄭。

引春秋傳晉惠公卜貳國之語。謂辭得稱君之貳也。中庸云見乎著龜動乎四體。謂禍福先兆有見于卜筮者。與形于人身動作者。鄭解爲龜之四體。春占前左夏占後左秋占前右冬占後右也。服問云從無服而有服。公子之妻爲公子之外兄弟。本謂妻爲其昆弟之爲父後者。期鄭謂外兄弟爲公子之外祖父母從母也。大學云之其所親愛而辟。辟與僻通。本謂用情偏僻。鄭解辟作譬。又見賢而不能舉。舉而不能先命也。本謂天命。鄭解命作慢。鄉飲酒義云。聖人制之以道。鄉人。士君子。本謂聖人制此禮以教鄉之衆人。

與士君子。鄭以鄉人士君子連下文尊于房戶之間
爲句。以鄉人爲鄉大夫。士爲州長。黨正君子爲鄉大
夫。士也。聘義云。宰尹旁達乎信也。尹割也。旁達者一
玉割而爲圭。爲璋。瑕瑜旁分。皆不失信。故曰旁達信
也。鄭解乎尹作浮筠。玉色也。喪服四制云。高宗諒闇
諒明也。闇暗也。猶言昧爽幽居愁慮不分。明之意。鄭
謂諒作梁闇作庵。訓爲倚廬。他如此。矧不可枚舉。必
若世儒謂學問不及。鄭則一切朦朧。小敢聲說承迷
習醉。何時而已。甚者解說不通。輒以忠變亂舊章。如
玉藻笏度樂記師乙雜記內子以鞠公喪大記君設

大盤等章。本無錯簡。自生顛倒。又如搢義首節。實錯簡而不知。其餘文字。如從容之作春容。汁獻之作汁莎。封作窆。純作緇。大圭不琢作不篆。監諸利作艷。諸利。諸侯茶作諸侯舒。其慎也。作其引也。祭義見間以俠甌。合見間二字作覲。曾子問告用牲幣。作告用利幣。曲禮日而行事。則必踐之。作必善之。樂記禮有報而樂有反。作禮有褒。喪大記加偽荒。作帷荒。中庸一戎衣。有天下。作一戎殷。若斯之類。亦不可勝記。今皆從舊。以俟後之君子參焉。

冠裳服色等制。詩書無明據。今世所得。皆鄭康成之

說愚按冕最貴弁次之冠通用上古冠制甚小僅取撮髮卽今羽流所戴是遺意也詩云臺笠緇撮緇緇冠也撮小貌字從元首也從寸小也從口象形也弁制大覆額詩云有頰者弁頰覆額貌弁盤也繁者大也字從升兩手拱捧以戴也用玄帛爲之者曰爵弁用皮者曰皮弁皮無飾者曰韋弁冕則加板于弁上前後垂旒其制又大于弁其形稍俛而前故曰冕冠弁冕皆用玄帛冠有用緇布者冕有用麻者古制也凡禮服衣裳殊常服衣裳連如深衣裘衣袍之屬皆連也凡服色多用玄緇纁纁卽赤周以火德王尚赤

玄緇二色皆自赤出。故冠服多用之。卽衮衣亦以玄爲地而加刺繡耳。裳多赤色。或玄黃。或雜不等。黻黻膝也。鄭謂黻色與裳相稱而易與詩多言朱芾赤芾。則是裳不離赤。然裳色不等而黻多赤。則是黻色亦不盡從裳也。鄭謂朝服玄衣素裳。皮弁服純素。弁用白皮。天子視朝。諸侯視朔。皆用之。羣臣亦然。夫平居無事。舉朝衣白。未見其可。卽殷人尚白。非必吉服純用白也。此未可信。端者。禮服之通名。凡禮服制方正。故謂之端。用玄爲玄端。用素爲素端。雜記云。端裘無等。則是裘亦可謂之端。非端定爲一衣也。裼襲之名。

不專指衣。單曰裼。重曰襲。凡手執寶器。重幣。亦稱裼。襲。呈現其物。而單藉之。謂之裼。不見其物。而重裘之。謂之襲。非但衣服。有裼襲耳。鄭謂裘上有裼衣。裼衣上有襲衣。非也。詳見各章。冕衣裳九章。引虞書山龍華蟲等為証。尤為牽強。詳見周禮司服。世儒耳食。康成以為知禮。不復思索。轉相信習。凡今之禮。非古之禮。皆鄭康成之禮也。

鬼神者。造化之靈。人物之命。大而天地山川。小而昆蟲草木。凡有生氣。不離鬼神。人者。鬼神之會。先王制為祭祀。使人知有鬼神。又制為卜筮。使人知有鬼神。

之靈所以顯造化之情狀。齊億兆人之心志也。洪荒之初。混沌未鑿。二氣苞孕。人物初生。鬼神道隆。叔季元始。剖散如日既中。幽曖全消。陽驕陰微。鬼道日遠。人事日益。是以殷人尚鬼。而周人尚文。世運自然也。孔子贊易。作十翼。不言卜筮。言義理。以開物成務。立人之道爲本。故曰務民之義。敬鬼神而遠之。神怪不語。非其鬼則不祭。是以臧孫居蔡。譏其不智。此孔門民義之教也。至于定禮。豈自背其說。而鄭康成解禮。專引讖緯。附合。如以五帝爲人。各有名號。姓字。句芒祝融等神。皆以人克數。其說怪誕。非聖人立教。務民

義之意。蓋天之有帝。以人事天之道。不得不爾。如鳥能祭。則必以鳥。獸能祭。則必以獸。各因其所固然。爲報本反始。非天果有帝如人也。猶曰稱宮。星稱垣。亦因人立名。豈曰真有宮。星真有垣耶。老氏曰。可名非常名。通乎此者。可與譚鬼神祭祀之義矣。

禮記通解卷目

第一卷

曲禮上

第二卷

曲禮下

第三卷

檀弓上

第四卷

檀弓下

第五卷

王制

第六卷

月令

第七卷

曾子問 文王世子

第八卷

禮運 禮器

第九卷

郊特牲

第十卷

內則

第十一卷

玉藻

第十二卷

明堂位

喪服小記

大傳

少儀

第十三卷

學記

樂記

第十四卷

雜記上

雜記下

第十五卷

禮記通解

卷目

二

卷目

喪大記

第十六卷

祭法 祭義 祭統

第十七卷

經解 哀公問 仲尼燕居 孔子閒居 坊記

第十八卷

中庸

第十九卷

中庸

第二十卷

表記

緇衣

奔喪

問喪

服問

間傳

三年問

深衣

投壺

儒行

第二十一卷

大學

第二十二卷

冠義

昏義

鄉飲酒義

射義

燕義

聘義

喪服四制

卷目終



禮記通解卷一

郝敬習

曲禮上第一

曲禮記行禮節目委曲也。曲細也。非其大者。

曲禮曰。毋不敬。儼若思。安定辭。安民哉。

此四語爲四十九篇之綱。禮之本也。聖人所謂脩己以安人。安百姓者。其道不外此。毋。禁止辭。隨事隨處皆當禁止。其怠慢之心。勿敢不敬。其容貌端莊儼然。若心有所思。內志惺惺。貌與心符。所謂正顏色斯近信也。多言損志。又當安定舒徐。言不妄發。如此則內

齊明而外恭。默心正身脩時措。咸宜君子所以篤恭而天下平也。有不能安民者哉。禮之體約而功博。如此

教註不可長。上聲欲不可從。疑志不可滿。洛樂不可極。

四不可。皆申致上文毋不敬之戒。學禮之本。心主

敬之目。

賢者。句狎而敬之。畏而愛之。愛而知其惡。憎而知其善。

積而能散。安安而能遷。

此舉居敬行禮之人為學禮之法。皆就恆情易偏者融之。所謂允執厥中。從心不踰矩。盛德之至也。賢者

舉其能敬之人。恆情狎則易慢。畏則易疎。惟賢者所
棄。能敬所畏。能親也。恆情溺愛則忘醜。過憎則棄善。
惟賢者愛知其惡。憎知其美也。恆情貪得則無厭適。
意則重遷。惟賢者財有餘。能散居。雖安不懷也。六者
惟不長。敖不縱。欲不盈。滿不極。樂者能之。蓋敬雖主
一之心。卽時中咸宜之道。執中無權。非禮之禮也。六
者時中。脩己安民之道。端在此。

按大學論誠意正心。以至治國平天下。不外好惡兩
者。此人情之矩。居敬之要。于此能毋不敬。則用中不
偏。絜矩篤恭而天下平矣。積而能散。二語卽財貨居

處以言仁者克已復禮之事。夫子母固顏淵屢空積而能散也。子貢貨殖積而不散也。蓋情動氣感如雲翳生空。雖賢聖不能無。而聚散起滅各有天則。苟非涵養精純者不能化也。安安而能遷則積散無心。所謂從容中道順帝之則。從心所欲無入不自得。如是而後大禮與天地同節矣。或曰。安而能遷。遷而能安。同否。曰。遷而能安者。止於至善。安而能遷者。介于石。不終日。可與幾也。兩者相因。所謂仕止久速無可不。可周旋中禮。盛德之至者矣。

臨財毋苟得。臨難毋苟免。狠毋求勝。分去聲毋求多。疑事

母質直而勿有若夫坐如尸立如齊禮從宜使從
俗

承上言居敬學禮者當法賢以自脩也利害學問容貌習俗四者皆學禮之地禮非廢財也苟得則不可禮非犯難也苟免則不可橫逆雖很勝負有定理求勝則不可分所當取多寡有常數求多則不可此處利害毋不敬也事理雖嘗學問而未深信勿輕以已之所信正衆之所疑非遂隱而不發也惟當直陳所見待人自擇蓋道本公共我知之非我自有之所謂博聞強記而讓雖有周公之才而驕吝無足觀此處

學問毋不敬也。至于出入起居各有矩度。時坐則如尸。尸象神坐必敬也。時立則如齊。齊對神立必敬也。而視聽言動可知。此動容貌毋不敬也。君子用禮義以爲質。苟生今反古矯世絕俗。非禮之禮。大人弗爲。故一敬常主。萬變隨時。使從俗舉一事。明之使謂以君命使于四方。從俗謂因其國俗。如居宋章甫之類。蓋禮強世則難行。宜民則可久。此處世羣俗毋不敬也。

夫禮者所以定親疏。決嫌疑。別同異。明是非也。禮不妄

說

悅

人不辭費。禮不踰節。不侵侮。不好聲。去聲狎脩身踐言。

謂之善行行脩言道禮之質也禮聞取於人不聞取人
禮聞來學不聞往教道德仁義非禮不成教訓正俗非
禮不備分爭辨訟非禮不決君臣上下父子兄弟非禮
不定宦學事師非禮不親班朝治軍非禮威嚴不行禱
祠祭祀供給鬼神非禮不誠不莊是以君子恭敬撝節
退讓以明禮鸚鵡能言不離去飛鳥猩猩生能言不離
禽獸今人而無禮雖能言不亦禽獸之心乎夫惟禽獸
無禮故父子聚麀攸是故聖人作為禮以教人使人以
有禮知自別於禽獸

此言禮之用甚切人當學禮也禮有隆殺則親疏定

有分辨則嫌疑決有等級則同異明有從違則是非分此禮之用也妄悅人爲禮則卑諂辭費用廢禮則鄙陋奢侈則踰節倨傲則侵侮戲謔則好狎此五者皆不明于親疏嫌疑同異是非之禮者也禮以脩身爲本踐言善行所以脩身也善則行脩矣踐則言道矣言道言可爲道也質猶本也取於人謂爲上所徵用達行之事來學謂爲學者所就正窮居之事苟人不我取而取人則辱己人不來學而往教則貶道君子行脩言道之身不爲也道德仁義同出于性禮卽斯四者之節文成體而可履者也共由曰道同得曰

德生理曰仁時宜曰義必有禮然後道德仁義行之而成也。教傲也。訓循也。上之立教以身。下之循訓以言。惟禮品節詳悉。然後教訓備也。客遊曰宦。宦學從師。遠學也。班朝班朝。朝廷位次也。治軍治軍。陳行伍也。禱。祈求也。祠。報賽也。祭。以接神。祀。以嗣續。供給謂牲幣。器皿之類。貌。肅曰恭。心存曰敬。裁。盈曰搏。制。過曰節。謙。卑曰退。推。與曰讓。六者。所以操心脩身。踐言善行。定決親疏。嫌疑。辨別同異。是非。而明禮者也。人以異于禽獸。唯此。鸚鵡。鳥名。猩猩。獸名。人與禽獸。血氣嗜慾。視聽食息。同。但人能言。而禽獸不能言。然禽

禮記卷之九 卷一
獸中有若鸚鵡猩猩言亦與人同而卒未免為禽獸者心無人禮耳苟人無禮口雖能言而心固禽獸又何別于鸚鵡猩猩乎鹿性善淫鹿牝曰麀

太上貴德其次務施報禮尚往來往而不來非禮也來而不往亦非禮也人有禮則安無禮則危故曰禮者不可不學也夫禮自卑而尊人雖負販者必有尊也而況富貴乎富貴而知好禮則不驕不淫貧賤而知好禮則志不懾

太上謂聖人貴德謂從心不踰矩盛德之至忘人我報施之迹也其次謂君子之學禮務報施謂使人我

兼盡也。孟子曰：有禮者敬人，敬人者人恆敬之。又曰：禮人不答，反其敬。子夏曰：君子敬而無失，與人恭而有禮，四海之內皆兄弟。卽往來報施，意聖人制禮，父慈則子孝，君敬則臣忠，夫唱則婦隨，兄友則弟恭，賓主相將，獻酬交酢，無施不報，無來不往，所以諧人情，勸恭讓，使壹壹不倦也。故報者禮之尚，而利者義之和，義無利，有時而睽，禮無報，有時而怠。此聖人制禮之精意，非故責效計利也。有禮則安，脩齊治平之福，無禮則危，放佚怠惰之禍。自天子至於庶人，莫不皆然。故曰：禮不可不學。禮以退讓爲本，自卑者人不能

卑之尊人者人亦必尊之此往來之定數也以下奉上以賤承貴以少事長皆自卑尊人所以為禮負販謂負擔鬻販者雖其貧賤為人父兄長上亦必有尊之者為人子弟必有所當尊者況富貴者可廢禮乎按自此以上論禮之綱以下數禮之目

人生十年曰幼句學二十曰弱句冠三十曰壯句有室四十曰強句而仕五十曰艾句服官政六十曰耆句指使七十曰老句而傳八十九曰耄句七年曰悼句悼與耄雖有罪不加刑焉百年曰期句頤宜

天地之數起于一極于九而終于十故聖人制禮以

節人情每十年一變以律天時盡人事調盛衰適盈
虛之節也人生十歲曰幼可以學矣二十曰弱已成
人而尚未壯可以冠矣三十血氣充足曰壯乃可以
娶妻而有室四十壯甚而強志氣堅定乃可出仕五
十肌髮色蒼如艾艾藥草老而刈始良故年長者謂
之艾是時乃可服從官政蓋四十強仕服事而已服
官政謂爲鄉大夫服事久諳練日深始可謀國政當
大任也六十曰耆耆久也詩云上帝耆之六十而天
地之數一周故曰久以意指使人不自勞也七十曰
老時宜退藏在家則致位避賢在家則委事授子止

足隨時不當復營戀世務也。八十九十則憊憤不明
曰耄老而耄與幼而七歲者皆曰悼雖有罪不加刑
蓋老耄與幼昏一也悼者憐恤之意人壽大約七八
九十止矣若夫百年大數一終謂之期猶限也。頤養
也百年之間精氣形神惟在所養得養而善則壽失
養而害則夭

按年與時俱長者造化之自然事與時俱變者人事
之當然皆所謂禮何但三代因之卽互天地古今盈
虛消息舉不能易聖人志學十年一變以禮教人亦
十年一易質義而行大畧如此非必拘拘十歲始學

二十後冠三十後娶四十後仕七十必傳也乃爲所
損益可知也故天子諸侯十二而冠卿大夫十五以
後皆冠說者謂文王十三生伯邑考十五生武王古
今名賢主子多在三十以前少壯登臚仕立功揚名
不待五十夫子七十一猶請討陳恆作春秋是七十
未傳也其他可知故曰禮從宜讀禮者舉一隅而三
隅可推矣

大夫七十而致事若不得謝則必賜之几杖行役以婦
人適四方乘安車自稱曰老夫於其國則稱名越國而
問焉必告之以其制

大夫年七十致還其職事于君。卽老而傳之義。謝釋去也。不得謝。謂君勉留也。賜君賜几。所以憑杖。所以扶行。役以婦人。隨奉養也。安車小車。一馬駕坐而乘之。禮大夫四馬車。立乘坐則安也。賜几杖以下三事。皆君優老眷留之禮。大夫在四方。對同輩以降。自稱老夫。在本國。父母之邦。則稱名。不敢自尊也。鄰國有事來問。必諮老成人。國有老成。文獻足徵。大夫對必稱先王先君之制。以告。此耆舊自處之禮也。君以耆舊之禮厚其臣。臣亦以耆舊之禮自盡。所以上下交而令終。老而愈親也。

謀於長者必操几杖以從之長者問不辭讓而對非禮也

謀就長者諮問也操几杖示爲役也從謂就而隨之也行則爲操之居則從之非定操其几杖以問也長者問長者謀于己也辭讓而對如子華言志曰非曰能之是禮也子路率爾而對非禮也

凡爲人子之禮冬溫而夏清

清去聲

昏定而晨省

呈上聲

在

醜夷不爭夫爲人子者三賜不及車馬故州閭鄉黨稱其孝也兄弟親戚稱其慈也僚友稱其弟也執友稱其仁也交遊稱其信也見父之執不謂之進不敢進不謂

之退不敢退不問不敢對此孝子之行也夫爲人子者
出必告反必面所遊必有常所習必有業恆言不稱老
温以致其煖清以致其涼昏則安定其寢晨則省問
其安醜夷衆等也言處衆不爭懼以忿辱親也三賜
三命屢錫也仕初命受職再命三命則君寵厚而體
統尊自當有車馬之衛而云不及者蓋出入鄉黨謙
退檢約如漢石慶入里門必下車之類有而不乘非
君賜而不受也若云父在之子皆不受車馬則大臣
之有車馬者鮮矣爲人子而貴不敢驕則孝謹之節
孚于輿情周禮五家爲比二十五家爲閭百家爲族

五百家爲黨二千五百家爲州萬二千五百家爲鄉
僚友同官者也執友同業者也交遊交相往來者也
慈弟仁信皆孝行之屬父執父同執業之友孝子見
父之執如父況見父乎三不敢敬謹之至凡出必稟
告反歸必面見遊有常欲親知所在也習有業率親
之所教也常言不稱老諱親之老不忘已之孺也自
言老則憂及父母故舜五十而慕老萊子七十爲兒
戲以悅親孝子之情也

年長以倍則父事之十年以長則兄事之五年以長則
肩隨之羣居五人則長者必異席

肩隨並肩而差後如鴈行也古者坐席地羣居則橫
席並坐四人長者居席首席向南北以西爲首席向
東西以南爲首若五人則長者專席

按古人席地亦有至理今不可用矣百昌不離地地
道最親坐必席地以卑法地不欲多上人也祭享皆
奠于地相見拜稽首皆至于地長者坐于地上接卑
幼非遠也後世用几案尊者踞高座使人委體拜于
足下尊卑懸殊非古人之意

爲人子者居不主奧坐不中席行不中道立不中門食
饗不爲槩祭祀不爲尸聽於無聲視於無形不登高不

臨深不苟訾。紫不苟笑。孝子不服闔。暗不登危。懼辱親也。父母存。不許友以死。不有私財。

禮命士以上。父子異宮。使子各遂其尊。若士庶父子同宮。則子居不當尊。古者室向南戶。近東南隅。其西南隅深間無事。謂之奧。以處尊者。明安樂也。尊者之居。故人子避之。少者坐無餘席。必垂近席邊。蓋食饗之禮。人各專席。居中則倨而當尊。古者男女異路。路各有中。尊者中道行。卑者或左或右。不當尊者所行也。門中央有臬。臬兩旁有張。不中門謂不當張。臬之間。蓋尊者出入由中。人子不得當之立也。臬。量也。家

事未傳。子孫不得待賓。如子爲士大夫。往來鄉禮饌具之類。亦順尊者裁定。已不得爲限制也。古者祭祀必卜其人爲尸。以像神。無父之子。則可爲之。有親在者。嫌以身近死也。聽無聲。視無形。誠敬之至。赤子之慕。無時忘之也。不登高。恐顛也。不臨深。恐墜也。不苟訾。恐招侮也。不苟笑。戒嬉戲也。不行暗中。遠嫌也。不登危險。防患也。數者皆足以喪身辱親。許友以死。後世任俠之事。古君子雖父母亡。未嘗輕以死許友。親在。雖國難。未輕死。況朋友乎。身體髮膚。皆親之有。況私財乎。有私財。是二其親矣。

為人子者。父母存。冠衣不純。如素。孤子當室。冠衣不純。
采。

凶主素。吉主采。父母俱存。人子平居吉祥。冠衣不全。用素。幼而無父曰孤。人生三十以上有室。則有代父之端。喪除。不稱孤。三十以下。父母早喪。平居亦稱孤。冠衣不全。用采。不忘親也。當室。適子當家。與衆孤異。鄭註。純。緣也。蓋據深衣解。禮言不必盡同。他處純又作緇。卽鄭且自異矣。

幼子常視母。誑童子不衣裘裳。立必正方。不傾聽。長者與之提攜。則兩手奉。上長者之手。負劔辟咎。二詔之。則

禮記文解 卷一
掩口而對。從於先生。不越路而與人言。遭先生於道。趨而進。正立拱手。先生與之言。則對。不與之言。則趨而退。從長者而上。丘陵則必鄉。向長者所視。

視與示同。童子天真無偽。不可示以欺詐之事。大人者不失其赤子之心者也。童子衣裘則迫近成人。衣下有裳亦成人之禮。服童子給役。惟襦袴耳。正方面正向一方。不疑立也。傾偏欹也。不傾頭左右屬聽。皆端重之容。提攜謂長者以手牽引。如提攜物然。則童子必兩手恭捧長者之手。致親敬也。負古背通。負劍謂長者以手加童子肩背。挾之腋下。如帶劍也。辟偏

也。呬口旁也。詔告語也。長者於童子耳邊以口旁語之。則童子必手自掩其口而應。勿使氣觸長者。先生謂父兄師長從隨行也。從長者行而越路與人言。是忘其所從也。遇先生于路。疾趨前進。不敢煩先生。就已也。恐有教令。正立拱手俟之。與已言則對。不言則趨退。不敢質問。亦不敢叩所往也。土高曰丘。陵遲可升。曰陵。嚮長者所視。視東亦東。視西亦西。恐長者有問。隨所見對也。

登城不指城上。不呼將適舍。求母固將上。上聲堂聲必揚。戶外有二屨。裾言聞則入。言不聞則不入。將入戶視必

下入戶奉

聲上局

視瞻毋回戶開亦開戶闔亦闔有後

入者闔而勿遂毋踐履毋踏

跡

席摳

寇上聲

衣趨隅必慎

唯

上聲諾

登高望遠人所共見自上視下人所疑忌指而呼則

驚惑者衆矣君子在車中不親指不疾言而況城上

乎舍旅館也旅邸不能無求若執平日所用器案如

意非爲客之義君子無處無物可以固求而于旅次

尤當戒也將升堂必先揚其聲使內人知避也古人

席坐脫屣而升羣坐惟長者一人脫屣於戶內餘皆

脫於戶外外有二屣則在坐非一人語聞于戶外則

可入不聞恐有密不當入也。入戶視必下不欲掩人所私也。扃鉉通門內外拴鈕也。排戶而入則兩手捧持其扃勿左右回視戶初或開或闔既入使開闔如初不違主人意也。當闔而有後入者則闔勿盡恐拒後入者也。毋踐屨不踐蹋先入者所脫之屨。踏亦踐也。長者所居席端爲上。長者先登則後來者自前序升如歷長者之位以就已位是謂之踏席也。摳提也。手提其衣便坐也。隅席角末坐也。幼者趨席末由末升也。慎唯諾長者有問唯諾必中節也。

按此類皆儀文末節然皆心術所形心苟不存則倒

行逆施。故曰德言慎。禮言恭。惟盛德之至。動容周旋。無時無處。非禮。君子所以不可斯須去身。操心之謂也。後多倣此。

大夫士出入君門。由闈右。不踐闈。

造化以東陽爲生物之鄉。易曰帝出乎震。故禮以東爲主位。人身左屬東。爲陽。家國天下。莫不有主。主不可移。可移則非主。故賓雖尊而必右。主雖讓而必左。君者國之主。其出入尚東。由左門。兩扉闈。植木室。扉曰闈。出入者由闈左右。闈東西自定。左右隨身出入。君自內南面東出。由闈左入。由西亦闈左也。臣自外

北面東入爲闌右出由西亦闌右也入由闌西則疑于爲賓出由闌東則疑于爲主故不敢也在他國則否闌門限踐則不敬且防傾跌

凡與客入者每門讓於客客至於寢門則主人請入爲席然後出迎客客固辭主人肅客而入主人入門而右客入門而左主人就東階客就西階客若降等則就主人之階主人固辭然後客復就西階主人與客讓登主人先登客從之拾級聚足連步以上上於東階則先右足上於西階則先左足

由外至內非一門寢門最近內而進則升寢堂矣

大門讓客先入及寢門主人先入設席然後出迎客致專敬也客固辭則主人止而肅客入肅謂俯首揖而進之卽肅拜也入門左右皆以身爲槩自外入東爲右主趨東階也西爲左客趨西階也客若降等謂客分卑于主主爲大夫客爲士之類則就主人之階示隨行不敢當賓也待主人固辭而後就西再讓曰固辭主人先登分尊也拾更迭也級階梯也兩足更迭升前足俟後足至而前足更上也猶雜記拾踊射禮拾取矢之拾聚足謂兩足聚一級連步階梯非一也東階先右足西階先左足順入門之左右主賓相

顧也

惟薄之外不趨堂上不趨執王不趨堂上接武堂下布

武室中不翔並坐不橫肱

國平聲

授立不跪授坐不立

帷慢也薄簾也趨直前疾進也見長之禮以疾為敬

惟薄之外不見尊者可自紆則不必趨堂上地迫執

玉恐墜皆不可趨武足也取強立意凡上文下武左

文右武冠下曰武所以為固也足下曰武所以為壯

也堂上不趨足跡相接舉步狹也堂下地稍寬可開

步布散其武也張拱緩步曰翔室中愈迫非脩容之

所肱手臂橫張兩肱恐妨並坐者凡授物長者立則

有言其角 卷一
己不必跪恐勞長者俯也長者坐則已跪而授之不
敢俯臨長者兩足並坐曰跪

按趨翔跪皆所以為敬然以趨為敬亦有不必趨者
以翔為敬亦有不必翔者以跪為敬亦有不必跪者
節文雖多時中而已故君子義以為質禮以行之明
于細而大可知

凡為長者羹之禮必加帚於箕上以袂拘溝而退其塵
不及長者以箕自鄉向而扱插之奉上聲席如橋衡請席
何鄉請社王上聲何趾席南鄉北鄉以西方為上東鄉西
鄉以南方為上若非飲食之客則布席席間函丈主人

跪正席。客跪撫席而辭。客徹重席。主人固辭。客踐席乃坐。主人不問。客不先舉。將卽席。容毋怍。兩手摳衣。去齊容尺。衣毋撥。剝足毋蹶。貴先生書策琴瑟在前。坐而遷之。戒勿越。虛坐盡上。後食坐盡前。坐必安。執爾顏。長者不及。毋僂。誓言。正爾容。聽必恭。毋勦說。毋雷同。必則古昔。稱先王。

糞。掃除不潔也。帚所以掃。箕所以盛糞。以帚加箕上。捧之而進退也。一手捉帚。一手舉袂環障帚外。且掃且移。卻步而退。使塵不及長者。拘鉤通舉。袂內向如鉤也。掃畢。以箕內向。扱地。斂取糞壤。不以箕向長者。

既掃布席。兩手奉席。高如橋。平如衡。長者欲坐。請問
面向何方。長者欲卧。請問足向何方。衽卧席也。凡坐
隨陰陽。如南向。東向之席。坐于陰方。則皆上右。蓋南
向以西爲右。東向以南爲右也。北向西向之席。坐于
陽方。則皆上左。蓋北向以西爲左。西向以南爲左也。
凡飲食之席。賓主不相對。非飲食而講說之席。則對
設。凡席制廣三尺有奇。兩席合中間空地約共一丈。
函合也。跪膝著地也。主人跪而正客之席。敬客也。客
以手按席止之。不敢當也。重席所以優客。固辭再辭
也。凡辭初爲禮辭。再爲固辭。三爲終辭。踐席。客將坐。

也。客坐主人乃坐。坐定主人先問勞客。客不先舉問也。凡卽席容貌端好舒徐勿矜持愧怍也。將坐必兩手摳提衣旁使邊齊離地尺許然後坐以便起居也。齊一作齋衣下邊也。撥開散也。驟掣動也。坐必收斂衣服足無動搖也。席間遇長者書簡琴瑟當前必跪而遷移之。慎勿跨越也。虛間並坐。陵越向前則疑于先人非謙也。當食並坐偃仰退後則似輕主人之饌不敬也。卽下文無餘席之意。或云盡前者以俎豆在前就之恐汗坐席也。僂撓通越次也。勦說猶亂說便給爭勝之狀。雷同附和阿比之狀。準古昔稱先王言

皆舊典可徵可信也

侍坐於先生先生問焉終

句則對請業則起請益則起

父召無諾先生召無諾唯而起侍坐於所尊敬無餘席

見同等不起燭至起食至起上客起燭不見

現跋 欽尊

客之前不叱狗讓食不唾

去聲

侍坐於君子君子欠伸

撰選杖履視日蚤莫侍坐者請出矣侍坐於君子君子

問更端則起而對侍坐於君子若有告者曰少間

閑願

有復也則左右屏而待

問終乃對不敢僂也古者席地坐以兩膝著席兩股

著是有請則伸股起起有二長者坐少者請業請益

問更端之類則膝跪而股起燭至食至上客至之類則足立而身起也請業問所習學之事請益既告而復問也諾者應之徐唯者應之疾無餘席者坐垂席端恭敬不寧之貌侍先生坐見同等者則先生亦其同敬敬有所專不敢顧私故不爲起燭至起以時變也食至起敬主人之供也上客起非同等長者之所敬亦敬也古者以薪炬爲燭燒餘爲跋勿使客見恐其厭久也叱狗惡聲嫌暴怒也讓食而唾近穢惡也吸氣曰欠舒體曰伸欠則氣乏伸則體疲撰古算通心計貌將起尋覓杖屨也視日早晚思息也皆厭倦

之容更端更舉一事問也起而對待命復坐也有告者他人告君子也少間須少空間也復白也必空間而後白則幾事也屏退也左右隨便也屏隱而待不敢干其私也

母側聽母數叫應母淫視母怠荒遊母倨立母跛坐母箕寢母伏斂髮母髻替冠母免勞母袒暑母褰裳侍坐於長者屨不上於堂解屨不敢當階就屨跪而舉之屏於側鄉長者而屨跪而遷屨俯而納屨

母側聽母側耳探聽人之私也應必和平母噉號暴厲也視必直母流移邪眄免也怠荒謂身體放散不

收也。遊行也。倨，驕傲也。跛，偏欹也。箕坐，伸兩足，狀如箕舌也。伏覆也。以胸腹帖席也。斂髮，以纒韜髮也。髻，假髮。一云髮，勿使髮垂如髮也。免脫也。非凶事不脫冠袒，解衣露體也。雖有疲勞之事，不得肉袒。雖當炎暑，不得揭下裳取涼也。屨賤，少者屨尤賤。長者坐於室，則著屨升堂而脫之。戶外以入。長者在堂，則屨不上堂而脫之。階下以升，屨有繫，解之不敢當階。爲妨後升者。有事暫起，就階下著屨，必跪而舉屨屏於側。著不當階也。禮畢退，長者送已，向長者前著屨。屨在階側，跪而遷移近已，勿妨長者降也。俯而納屨，不跪。

者納屨足在前也

離坐離立毋往參焉。離立者不出中間。男女不雜坐。不同施。移枷架不同巾櫛。不親授。嫂叔不通問。諸母不漱裳。外言不入於梱。內言不出於梱。女子許嫁纓。非有大故不入其門。姑姊妹女子子已嫁而反。兄弟弗與同席。而坐弗與同器而食。

離猶麗也。兩相與曰麗。兩成離。加一爲參。兩人同坐立。必有所私。毋往參之。道遇麗立者。行其旁。毋出其中間。枷架同置衣服之具。橫者曰施。巾以拭汗。櫛以理髮。問贈貽也。詩云。雜佩以問。諸母。父妻之有子者。

漱浣也。裳，褻服。不使漱裳，惡瀆尊，遠嫌也。內言外言，男女各職也。梱，門限也。內外有限，男女不相通言也。纓，佩也。條，組之屬。女子既許嫁，佩纓成人之飾也。大，故謂病喪之類，非是不入其門。門，謂女子所居室之戶。女子子，卽女也。重言子者，別于男子之爲子也。兄弟，謂姑姊妹女子子，各有兄弟也。坐食，男子在堂，則婦人在室。

父子不同席

古者一席坐四人，父子同席，則尊卑無等，父必異席。男女非有行媒，不相知名，非受幣，不交，不親，故日月以

告君齊戒以告鬼神為酒食以召鄉黨僚友以厚其別也。取去聲妻不取上聲同姓故買妻不知其姓則卜之

行媒謂媒氏通往來也。名謂男女之名受幣謂納幣以後乃通交相親也。周禮凡判妻入子者媒氏皆之以告君也。告鬼神者告其先祖非是則無別為此以厚別也。厚猶遠也。妻取同姓則近于禽獸。妻或不知姓亦必卜之以決疑也。

寡婦之子非有見焉弗與為友

寡婦之子弗輕與之為友避嫌也。見謂其子有德業聞望表見于世無所見而友其子欲何為乎。所以嫌

也

賀取妻者曰某子使某聞子有客使某羞

凡以財慶人曰賀昏禮無賀以人子將有嗣代之憂也如賀則直云某聞子有客使某來進食不直言賀也某子賀者名使某使者自名羞進食也

貧者不以貨財爲禮老者不以筋力爲禮

貧者不能備將禮之物老者不能任行禮之勞禮不在儀文故無財亦可行也禮不在周旋故衰老亦可行也不然豈貧者老者遂無禮乎故曰禮云禮云君子義以爲質此之謂也

者言文解 卷一 三十一
名子者不以國不以日月不以隱疾不以山川
子生三月而父名之義方之始不可不慎以國則僭
上以日月則褻天以隱疾則貪菑以山川則瀆神推
而廣之必正乃順隱疾隱諱之疾如目疾名瞎足疾
名跛之類

男女異長男子二十冠而字

異長各自爲伯仲男子之長幼達于四方女子之長
幼閨門之內耳故不相雜男子冠而字之重成人不
斥其名也

父前子名君前臣名

名謂自稱與稱同輩皆以名父尊于一家子自稱及稱家衆皆以名也君尊于國臣自稱與稱他人皆以名也春秋傳鄢陵之戰晉侯陷于淖欒書欲載晉侯鍼曰書退鍼書之子也對晉侯稱書是君前子亦名父他可推

女子許嫁笄而字

女子十五以上皆可許嫁許則十五而笄未許則二十亦笄矣字之亦敬其名也

凡進食之禮左殺右馘志食居人之左羹居人之右

膾炙隻處外醯醬處內葱蒜深處末酒漿處右以脯脩

禮記卷之九
第一
置者左胸也。右末。客若降等，執食與辭。主人興辭於客。然後客坐。主人延客祭，祭食祭所先進。殺之序，徧祭之。三飯。主人延客食，載然後辯殺。主人未辯，客不虛口。

殺牲體熟而升之俎也。載，純肉切而盛于豆也。謂之殺者，骨肉雜也。禮重骨賤肉，故左殺右載。食飯也。殺食爲主，故居左。肉汁爲羹，羹陪食，故居右。細切爲膾，燒肉爲炙，盛之以豆。居食羹之外也。醢，醬屬。或云醢也。醢通爲醬，醢醬之類不一，皆所以和。諸饌亦盛以豆。居殺載之內也。葱，溲所以爲和也。溲當作屑。內則云：屑桂與薑，士喪禮云：醢醢屑是也。亦盛以豆。居諸

饌之末漿諸飲之屬周禮有三酒六飲居右與羹近
取便也脯脩皆乾肉薄析曰脯脯始也始成爲脯捶
而施薑桂曰脩脩治也治而後成也胸屈也末謂
兩端乾肉屈中而以末端向右食脯先末便于擘取
也降等謂客分卑於主人也執食起辭如儀禮臣食
于君先捉飯而起欲往食于堂下之類主人起止客
然後客坐也延請也食每品取少許置于豆間之地
以祭先代造食之人不忘本也若散客則自祭不須
延請若降等之客待主人延請而後祭也凡祭食之
禮祭其所先進之食後進者後祭之各以進殺之序

祭之必徧也。飯食飯也。三飯三食也。每飯皆食殺。搗以醯醬。殺與飯爲正饌。三飯竟。主人乃延客。食載然。後徧食各殺。辯徧通周也。必俟主人食殺。徧而後客止。如主人方食客虛口不食。是違主人之意也。

按飲食人之大欲。無禮則亡。厭故先王因飲食行禮。俎豆有常品。陳設有定位。以將敬而導讓也。苟薦獻有文辭。受有節。豐儉有數。因時制宜。皆可名禮。故夫殺載之左右。羹炙之內外。脩脯之本末。主客之拜興。善用禮者。不簡不煩。當乎人情。愜乎事理。合乎時宜。所謂義以爲質。禮以行之。遜以出之。信以成之。如是。

而已故禮有情有文非徒鼎俎之多寡左右之陳設
一一依倣陳跡如鄭康成輩牽強附合虛敝精神無
適于用耳

侍食於長者主人親饋則拜而食主人不親饋則不拜
而食共食不飽共飯不澤手毋搏團飯毋放飯毋流歎
毋宅查食毋齧擊骨毋反魚肉毋投與狗骨毋固獲毋
揚飯飯黍毋以箸毋噉答羹毋絮羹毋刺齒毋歎醢客
絮羹主人辭不能亨客歎醢主人辭以寔濡肉齒決乾
肉不齒決毋最並炙隻

主人卽長者饋進饌也共食與人同席食也非賓主

勸侑而飽則所取多矣。共飯與人同器而飯也。古人飯以手不澤手手必潔也。沾汗曰澤汗出曰手澤涎沫曰口澤凡涎沫著手羹汁染手皆謂之澤人所穢惡也。搏飯團取飯欲其多也。放飯捨食也。流歃亟飲也。咤口舌聲齧骨嚼骨有聲反魚肉以所食餘反于器也。投與狗骨則賤主人之物。固獲堅取必得也。揚飯去熱急於食也。飯黍以匕不以箸著以食殺非飯黍也。羹有菜食用箸。選以口選取也。架羹別取蔬品入羹和之也。刺齒剔齒也。醢醬屬味鹹以殺捕食之。非可歃也。可歃則味必淡。故客祭羹則似調和未善。

主人辭以不能烹客歆醢則似醢味薄無殺可飽故
主人辭以貧窶濡肉輒濕之肉齒決以齒斷而食之
不須手也乾肉脯脩之類必手擘之而後可食用齒
決斷則失容也一舉盡鬻曰最以上數者皆貪饕粗
率之狀君子于觴酒豆肉未嘗不退讓以養廉也

卒食客自前跪徹飯齊

齋

以授相者主人興辭於客然

後客坐侍飲於長者酒進則起拜受於尊所長者辭少
者反席而飲長者舉未酬醢少者不敢飲長者賜少者
賤者不敢辭賜果於君前其有核者懷其核御食於君
君賜餘器之漑者不寫其餘皆寫餽餘不祭父不祭

子。夫不祭妻御同於長者。雖貳不辭。偶坐不辭。羹之有菜者用挾。夾其無菜者不用挾。爲天子削瓜者副。男之巾以締。苦爲國君者華。花之巾以綌。陳爲大夫累。果之士。憲。帝之庶人斲。斲之。

卒食。食畢也。客自出向席前。跪而取已所食之飯。與醬齊。授佐食者。將以持歸。卒主人之惠也。齊與壘通。卽菹醢之菹。獨徹飯齊者。食以飯齊爲主也。唯受食於尊者。親徹賓。若敵則主人起。辭客坐而相者代徹也。尊者盛酒器。尊所置酒尊之。所謂之尊者。燕飲主酒主爲尊也。故主人當尊。天子諸侯飲其臣則尊。尊燕

與鄉飲則尊在房戶間賓主共之主尊賓賓尊主之義也故長者就尊酌酒少者必起就尊所而拜長者辭拜少者乃反席飲俟長者飲盡酌而後少者乃敢飲盡飲曰酬君前食果不敢棄其核卽勿投與狗骨之意御食於君如爲君佐食之類非侍食也侍食則不必賜餘矣器之漑謂如賜爵之類禮所必洗則卽其器食之不必更瀉之別器也如其器未可便洗者則當瀉于別器食之不敢與君同器也食餘曰餒尸餒鬼神之餘臣餒君之餘賤餒貴之餘下餒上之餘餒餘皆有豆間之祭但不可以祭先祖與他鬼神故

孔子君賜食先嘗不祭唯腥則熟以薦也子生則餽
父之餘子死則父不得以已所食之餘祭之妻生則
餽夫之餘妻死則夫不得以已所食之餘祭之而況
祖考與外神乎御同於長者謂同長者食也凡用物
當前曰御貳陪也同長者食雖盛饌與長者爲貳不
必辭以其爲長者設也偶遇也遇則成偶遇席偶坐
雖盛饌非爲已設亦不必辭也挾箸也鉶羹菜和用
箸大羹無菜乃可飲也爲天子削瓜副之副勞同析
破也以細葛巾覆之而進華花同半破如花開不斷
也葛之粗者曰綌累綌適但華之而不用巾猶檀弓

之云剝奠也。寔蒂通亦不華但去其蒂而已。齟之亦不寔以齒自齟而已。

按玉藻及士相見禮皆云君賜爵卒爵而俟君卒爵是以先飲爲禮也。故禮不必強同。因時制宜。敏於從尊者之命。先飲可也。讓以待尊者之命。後飲亦可也。解者謂公私不同飲。豈私燕遂無導飲之禮乎。長者有賜當受。亦有義不可受。雖君命辭。若子思之鼎肉。孟子之兼金是也。削瓜細事。諸侯以下不得勞。明微辨等云爾。非謂庶人之瓜。但可斷蒂而劈瓜者皆犯禮也。解者曰。公庭大會則爾。非謂平日然則禮惟公

庭有之。平日無禮乎。且庶人何得與天子同堂食瓜。附會不得。而強爲之說也。大抵禮者。人情耳。無恭敬之心。非人也。無是心。則講求是禮。有是禮。則反求是心。今不求制禮之義。與行禮之心。但比擬求合于古人之跡。牽強支離。亦不可行矣。

父母有疾。冠者不櫛。行不翔。言不惰。琴瑟不御。食肉不至。變味。飲酒不至。變貌。笑不至矧。怒不至詈。利疾止復故有憂者。側席而坐。有喪者。專席而坐。

不櫛。不櫛髮也。首必櫛而後加冠。冠而不櫛。匆遽之至也。翔。緩步也。惰。慢也。不惰。言語較平時迫切也。君

子無故不去琴瑟。父母疾則不樂也。變味謂厭飫知味也。變貌謂酣醺改色也。齒本曰矧。笑而見矧是劇驩也。怒罵曰詈。怒而至詈是忘憂也。有憂如親疾大患難之類。側獨也。猶儀禮側尊側授之側。側席謂獨席不別設席待賓也。專席謂不與衆人共坐。吉凶不相襲也。

水潦降不獻魚鼈。獻鳥者佛拂其首。畜鳥者則勿佛也。獻車馬者執策綏雖。獻甲者執冑宙。獻杖者執末。獻民虜者操右袂。獻粟者執右契。獻米者操量鼓。獻熟食者操醬齊齏。獻田宅者操書致。凡遺人弓者張弓尚筋。弛

弓尚角右手執簫左手承附撫尊卑垂幌若主人拜則

客還旋辟開辟避拜主人自受由客之左接下承附鄉

向與客並然後受進劍者左首進戈者前其鋒後

其刃進矛戟者前其鉞陳進几杖者拂之效馬效羊者

右牽之效犬者左牽之執禽者左首飾羔鴈者以績受

珠王者以掬受弓劍者以袂飲玉爵者弗揮凡以弓劍

苞直簞筥問人者操以受命如使去之容

水潦方降則魚鼈不足貴故不以獻于尊者獻鳥者

必換列轉其首止其豕而防其逸也如欲畜之則勿

拂恐其傷也佛拂通車馬不可以登堂獻則執捷馬

之策與升車之綏先之冑在首甲在身呈冑自知有
甲矣獻杖則執末授長者以本也民虜戰勝所獲之
人獻則操持其右袖防有異志也獻粟收取必以契
契必合兩書契先右執右爲尊也鼓量器操量鼓進
則知有米也粟久儲故執契米卽用故執量醬齊所
以和味先醬齊自知有熟食也書版冊也獻田宅以
書致之凡弓筋在外角在內授張弓筋向上授弛弓
角向上使兩梢下垂便于授也簫梢通弓末也附弓
中央把處如花之有柎故名柎右手執梢左手承柎
便也尊卑謂賓主無貴賤一也垂幌猶垂佩幌佩巾

賓主授受身皆磬折其佩懸而垂也客謂使者主人拜而後受客執弓旋辟以避其拜還辟回旋開辟也但避不答拜者主人拜聘主非拜使者也主人自受謂不遣人代也由客之左客自外入則西爲左接下亦右手執簫卻左手接客之下承其弣也鄉與客並謂與客並立同向然後受之不逆受也進劔以把爲首左其首尊者左以首授之避刃也戈如戟旁有橫刃向下所謂鉤戟也矛似鋌而三隅戟兩旁皆有橫刃向上鎗斂皆柄下鐵銳者曰鎗平者曰斂前鎗斂亦避刃也進几杖者必拂去其塵效猶呈也馬與

羊右手牽之便用力也犬左手牽之以右手防齧也執禽皆左其首尊者左以首向之也獻羔鴈者畫布飾之受珠玉者以兩手掬之受弓劍者以衣袖承之飲玉爵者雖有餘瀝不揮洒防失墜也苞包裹之苴承藉之或以葦或以茅魚肉之類也竹器圓曰簞方曰筥盛飯食之器也凡操持此物遠人者受使命之初卽如出使在彼之容則臨事可無失禮矣凡爲君使者已以受命君言不宿於家君言至則主人出拜君言之辱使者歸則必拜送于門外若使人於君所則必朝服而命之使者反則必下堂而受命

朝受君言夕舍于郊故曰不宿於家朝服而命之則拜送反受命亦朝服可知拜君言之辱朝服又可知已

博聞強

平識志

而讓敦善行而不怠謂之君子君子不

盡人之歡不竭人之忠以全交也

多學而不傲人以自用篤于行善而不以少得自止斯誠君子矣人有好于已勿求其好之必盡人有忠于已勿責其忠之必竭如此則我望人不過厚而人施于我易為德彼我之間可常繼全交之道也

禮曰君子抱孫不抱子此言孫可以為王父尸子不可

以爲父尸爲君尸者大夫士見之則下之君知所以爲尸者則自下之尸必式乘必以几

禮古禮也祖父憐孫之幼常擁抱之子長則不抱父嚴祖慈人情也記者引此以明孫爲祖尸之意蓋惟其死則爲尸故生則鍾愛曾子問云尸必以孫孫幼則使人抱意與此異王父祖父也君尸謂天子諸侯祭祀公卿大夫爲尸者已筮已宿大夫士遇于外則下車敬之也君遇于路知其臣已筮爲尸者亦下車尸皆式于車上答之也尸乘車必加几于式使憑以優之也

按古者惟祭殤無尸。內外之神祭皆以尸。內神用同姓外神不擇姓。勝國之社稷則士師為之。宗廟之祭主人之子為之。使其父北面拜其子。近逆飲食生人以為鬼。近戲此古禮之不可強通于後世者也。

齊徒半者不樂不弔

遇大事而齋戒則不為樂不弔。哀專志以養誠也。

居喪之禮毀瘠不形視聽不衰升降不出阼階出入不當門隧居喪之禮頭有創平則沐身有瘍則浴有疾則飲酒食肉疾止復初不勝升喪乃比於不慈不孝五十不致毀六十不毀七十唯衰惟麻在身飲酒食肉處

於內生與來日死與往日

孝子哀痛自不免於毀瘠然使銷肌見骨則反傷生使耳目昏亂則反廢禮升降不由阼階不忍歷親之位也出入不當門中道不忍踐親之迹也居喪不整容故不沐浴不甘味故不進酒肉然有瘡瘍沐浴可也。有疾病酒肉可也。疾止復初仍不食也。孝子之身親所寄託之身以啓後則爲慈以承前則爲孝苟過哀傷生廢禮謂之不勝喪雖慈孝乃比於不慈不孝者不致毀不極毀傷也年愈衰則哀當愈節孝子居喪三年是生者來之日也。父母喪已三年是死者往

之日也。生者不忘，久而若暫；死者不生，近而若遠。與
猶數也。生數來日，如親死四日成服，喪禮以爲三日，
祥禫皆越月而後祭，祥雖兩期而從吉，直須二十七
月，是生者之喪必數來日也。死數往日，如親喪二十
五月，實得兩期，遂爲三年，是死者之期但數往日也。
數來者雖久，猶若未久；孝子自盡之心也。數往者未
久，以爲久；孝子思親之心也。聖人制禮，斟酌情理而
損益之也。

按前云爲人子者，居不主奧，行不中道，立不中門，故
居喪不由阼階，出入不當門隧，猶親存也。故曰事死

如事生父沒觀其行三年無改於父之道可謂孝矣
禮者人情而已非泥跡也孔疏謂祔祭以後得升阼
階引雜記弔者入主人升堂西面爲敬賓乃由阼恐
亦不止此顧其心何如耳泥跡比擬非禮之義

知生者弔知死者傷知生而不知死弔而不傷知死而
不知生傷而不弔弔喪弗能賻附不問其所費問疾弗

能遺不問其所欲見人弗能館去聲不問其所舍賜人者

不曰來取與人者不問其所欲適墓不登壟助葬必執
紼臨喪不笑揖人必違其位望柩不歌入臨不翔當食
不歎鄰有喪春不相去聲里有殯不巷歌適墓不歌哭日

不歌送喪不由徑送葬不避塗潦臨喪則必有衰色執
紼不笑臨樂不歎介冑則有不可犯之色故君子戒慎
不失色於人

恤生曰弔哀死曰傷二者非可混施也以財助葬曰
賻問人之乏而不能濟是失言也賜人而使之來取
是無禮也與人而問所欲是矜惠也壘墳也登墳則
躡踐死者不敬也引棺之索曰紼助喪本爲相事非
爲客也故必執紼示效力也與人揖必出位以變爲
敬也入哭人之喪勿舒徐翔行也憂則廢食食則輟
憂非歎所也五家爲鄰鄰有喪舂米者不唱和相助

也二十五家爲里不巷歌不歌於里之巷也送喪由
截徑避泥水是憚勞也身被介冑則必有不可犯之
色臨喪則必哀戚之色故君子每事戒慎必誠必信
服必稱情外必由衷不失色於人也

國君撫式大夫下之大夫撫式士下之禮不下庶人刑
不上大夫刑人不在君側兵車不式武卓綏綏平旌德

車結旌史載筆士載言前有水則載青旌前有塵埃則
載鳴鳶前有車騎則載飛鴻前有士師則載虎皮前有

擊至獸則載貔皮貅休行前朱雀而後玄武左青龍而

右白虎招搖在上急繕其怒進退有度左右有局各司

其局父之讐弗與共戴天兄弟之讐不反兵交遊之讐
不同國四郊多壘累上聲此卿大夫之辱也地廣大荒而
不治此亦士之辱也

撫俯憑也式車中較下橫木有所致敬則俛而以手
撫之如過宗廟之類君所撫式大夫過則下大夫所
撫式士過則下朝廷之禮論爵庶人無爵故禮無下
逮庶人者大夫近君有罪別議周禮有八議不可議
同姓則刑于甸師勿使人見異姓則刑于朝不棄市
以重有爵也有罪被刑之人不使近君側防懷怨也
兵車尚威猛而不讓故不式武車卽兵車旌載于車

上綏綏通散垂貌詩曰淑旂綏章武容飛揚故散其
旌垂綏然也德車文車貴安恬故纏結其旌史載筆
謂君行史官載筆隨以記事也士掌故官屬言謂訓
典前謂前驅君行師從前驅遇變必舉類示後使知
備也載舉之車上也青青雀水鳥旌畫青雀于旌上
塵埃起則前有衆伏風能揚塵鳶鳴多風故舉鳴鳶
也見車騎成行則舉飛鴻鴻飛成列也士師掌刑殺
之官在前謂爲先鋒舉虎皮以張威武也前遇猛擊
之獸則舉貔貅之象使衆知備也此四者畧舉其類
蓋師行人衆有急未可言傳但舉旗幟以齊三軍之

耳目也下文因以五方旗色承之行謂行師凡軍前
爲南鳥南方七宿朱火色前建鳥旗七旂以象鷄火
鳥宿之屬有星星凡七星也武北方七宿玄水色後
建龜旒四旂以象營室武宿與東壁連體四星也軍
東爲左龍東方七宿青木色左建龍旂九旂以象大
火龍宿之屬有尾尾九星也軍西爲右虎西方七宿
白金色西建熊旗六旂以象伐虎宿與伐參連體六
星也招搖天中北斗七星上謂中軍北斗杓轉衆星
隨之故居中央軍行爲五方之旗法五星以指揮士
卒而招搖在上者將帥居中舉招搖之旗督作三軍

之武怒也。急猶督也。繕猶作也。度謂進止之律局。謂部分皆所謂軍禮也。下文因以敵讐承之不共戴天。猶言不與同生也。不反兵謂不待還取兵。兵常自隨也。四郊城外四郊壘屯軍之壁。卿大夫不能謀國。致寇納侮。士未遠於庶人。食祿代耕而不勤民事。各以爲辱也。

按父讐三語言帥臣分間敵愾之義。四郊二語言人臣謀國任事之忠。或古聖有爲而言。猶速死速朽之類。如春秋魯莊公忘父讐爲齊諸兒主婚。儒者矯其非。遂以報讐爲大義。後儒遂緣飾大復讐之例。要之

非通論也。傳記成于後，儒手非先聖之舊，而此一節多春秋諸侯盟會征伐之事，非先王巡狩朝會太平之文物。所述前載後備，皆倉卒道路掩薄權宜之術。青龍白虎招搖等名，後世緯釋小說，非聖人雅言所執之禮。鄭康成輩每屈經從緯，禮壇經訛，由訓詁始也。

臨祭不惰，祭服敝則焚之，祭器敝則埋之，龜筮敝則埋之，牲死則埋之。凡祭於公者，必自徹其俎。

不惰，祭如在也。祭服祭器敝壞，以他用則褻神，故焚而埋之。牲，犧牲未用死，與犬馬之屬，皆是。人臣助祭。

于君有獻俎祭畢各歸之臣必自徹者不敢當賓也
鄭謂獨士當自徹亦拘也

卒哭乃諱禮不諱嫌名二名不偏諱違事父母則諱王
父母不違事父母則不諱王父母君所無私諱大夫之
所有公諱詩書不諱臨文不諱廟中不諱夫人之諱雖
質君之前臣不諱也婦諱不出門大功小功不諱入竟
境而問禁入國而問俗入門而問諱

卒哭謂朝夕哭也未葬哭不絕聲既葬返而三虞惟
朝夕哭思至哭故謂之卒哭卒哭則祔主于廟乃有
諡以易名名所以名其質也人死質藏則名隱孝子

聞名思親不忍舉也。鄭謂生不諱名非也。人子于親生死同，死不忍聞，生亦不敢斥，但生則名有必用，不可盡諱，死則名不復用，諡方新而名可釋矣。故諱自卒哭始，卒哭之日，生事終而死事初也。嫌名，名不同而音相近，二名，二字為名，偏舉一字，則不諱。蓋禮至諱名，而尊崇哀敬之情極矣。惟三年之喪為然，期以下無此禮。期喪有諱，惟王父母，而王父母之諱亦以父之所諱諱之。荀子幼孤，不及見事父母，未嘗聞父之諱，祖則已，亦可不諱矣。凡諱惟在家則然，在朝廷君前，雖子不得諱父，在大夫之家國之所諱者，則諱

之亦無私諱也不以諱改詩書之語不以諱易記載
之文恐其害義理也廟中有先祖在則尊無踰者故
皆舉名如雝詩禘太祖則文王之名亦不諱也君夫
人之諱卽君夫人之名質猶當也雖當君前臣亦不
諱其非君前與非臣可知何也婦人尊貴者之名惟
諱於閨門中門外非婦人得預也大功小功服殺分
輕故不諱孔氏謂大功小功亦當從父之諱是拘于
逮事父母則諱王父母之文而失其解者也蓋禮至
于諱事愈輕而情愈重非君父無是豈可槩施乎入
竟入國之界首入國入城中入門入主人大門亦畧

言其義始必待入城而後問俗及人之門而後問諱亦迂矣是鄭康成之禮也

外事以剛日內事以柔日凡卜筮日旬之外曰遠某日旬之內曰近某日喪事先遠日吉事先近日曰為去日假爾泰龜有常假爾泰筮有常卜筮不過三卜筮不相襲龜為卜筮同為筮卜筮者先聖王之所以使民信時日敬鬼神畏法令也所以使民決嫌疑定猶與去也故曰疑而筮之則弗非也日而行事則必踐之

舊說外事謂巡狩朝會征伐之類內事謂宗廟祭祀冠昏之類天干五奇甲丙戊庚壬為剛日五偶乙丁

已辛癸爲柔日外剛內柔外陽內陰也其說蓋附會
小雅吉日之詩郊特性云郊用辛郊亦外事也而辛
又用柔又云社日用甲社后土陰也而甲又用剛喪
祭鬼事用柔日可也冠昏人事何以用柔女昏爲內
事可也男冠何以稱內其說未足憑聖人用禮未嘗
爲此拘拘也卜筮日謂卜筮其行禮之日旬內外謂
卜十日內外也曰遠某日近某日者命龜筮之辭喪
事謂葬與祥禫之類奪哀之事則先遠日示不急也
吉事謂祭祀冠昏之類則先近日情欲伸也先謂不
從乃改擇也曰亦命辭假借也言爲擇日借爾泰龜

禮記卷之九十一
泰筮也泰尊之之辭有常信之之辭吉凶有常故可
信也卦成于三故卜筮三不吉則不復問也襲重也
三卜不吉則止不可重筮三筮不吉則止不可重卜
也筮策同以著草爲筮也卜筮之設非倚鬼神而忽
人謀聖人謀已定矣聖人所信者衆人所疑法令所
不能行者借鬼神以定之此聖人神道設教之權故
曰所以使民非爲已也所以使畏法令非畏鬼神也
所以決民之嫌疑定民之猶豫非聖人嫌疑猶豫待
卜筮決定之也嫌疑未明也猶與未斷也與作豫此
數語善言卜筮若後儒言卜筮以人事仗鬼神豈聖

人作易本義哉。既疑而筮之，筮定則不當復疑。既諒日而行事，得日則當必踐。此教人勿疑也。鄭改踐作善。

按鄭以踐作善，因春秋葬敬嬴與定公皆改日違卜。左傳誣以爲禮，鄭遂謂日可以不踐，非也。卜筮已定，已決而又不踐，何取于決疑定猶豫乎？鄭之壽張附會類此。

君車將駕，則僕執策立於馬前已駕。僕展軫零效駕，奮衣由右上。上取貳綬，跪乘執策分轡，驅之。五步而立。君出就車，則僕并轡授綬，左右攘辟，車驅而騶。騶至于大

禮記卷之九 卷一
門。君撫僕之手，而顧命車右就車門。閭溝渠必步。凡僕人之禮，必授人綏。若僕者降等，則受。不然則否。若僕者降等，則撫僕之手。不然則自下拘。溝之客車不入大門。婦人不立乘。犬馬不上於堂。故君子式黃髮，下鄉位。入國不馳，入里必式。君命召，雖賤人，大夫士必自御之。介者不拜，爲其拜而箋。判拜。祥車曠左，乘君之乘車，不敢曠左。左必式。僕御婦人，則進左手，後右手。御國君，則進右手，後左手。而俯。國君不乘奇車，車上不廣欬。紫不交指立視。五嵩。辨式視馬尾，顧不過轂。國中以策。葦卹。句勿驅。句塵不出軌。國君下齊。齊牛。式宗廟。大夫士下公。

門式路馬乘路馬必朝服載鞭策不敢授綬左必式步
路馬必中道以足蹙路馬芻有誅齒路馬有誅

此節言乘車之禮僕御君車者大夫士也策刺馬杖
將駕別有人牽馬就車而僕臣執策立馬前監之軫
車式前欄楯君所憑處以篋覆之故須展視也效駕
試習也奮衣攝衣或云振衣去塵致潔也由右升者
左當君位避也貳副也綬挽以登車之索也取自取
也凡車兩綬正綬曰良綬僕者負之君升執之副綬
曰散綬繫車上僕與戎右升執之凡乘車倚較立效
駕則跪示敬也右手執策分四馬八轡以駮二轡繫

軾前其六轡左執三右并策執三分轡乃驅試之五步而止待君出也君出就車僕以六轡併一手以一手取正綏負之撓君挽以升僕乃左右攘辟人避道乃驅車也攘揮也辟開也騶猶馳也凡御車僕中立君左勇士右爲衛大門君外門天子五門諸侯三門君由內門登車勇士尚未登車右卽勇士也車至大門外君乃按撫僕手止車顧命勇士登門外備非常也行過門閭溝渠勇士必下步行蓋過閭里君式則臣當下又門閭防姦穴溝渠防險阻也凡御者授綏登者分尊乃可受不然讓無受也卽尊者當受亦必

撫止御者之手以示少讓其不當受者則自御者手下拘其綏自執之以升也凡賓客乘車不得入主人大門敬主也凡婦人乘車不得如男子倚立避外也凡庭竇犬馬不上於堂賤畜也此皆所謂質義之禮也故君子在車見黃髮則式敬老也過卿大夫之位則下敬貴也入國不馳衆所聚也入里必式父兄親族所居也奉君命有所徵召其人雖賤無爵而大夫士以君命往其人來亦必親爲之御君之所敬亦敬之也披甲鎧者不屈體拜蓋文武不同容冠裳雖雜則其拜也和順而拜也甲冑暨籃則其拜也剝折而

拜容不稱服也。祥車，送葬之車。乘則虛左，死者之靈居車左，避也。乘君車，謂君出副車從，臣代君乘，則不敢虛左，不以凶率擬君也。然立君之處，必憑式以示不安也。御婦人之車，婦人在左，御者進左手執轡，面右，遠嫌也。御君以右手執轡，面向左，不敢背君，而身常俯，示恭也。名器莫重于車，周禮五路六等之數，皆有正法，不如法者，謂之奇車，不軌不物，則君不乘。車上居高聲大，欬手妄舉，非靜正之容也。立謂倚較，立，嵩，規，通車輪一轉為一規，五嵩謂輪五轉，輪高六尺六寸，圍一丈九尺八寸，五輪之地九丈九尺，每步

六尺蓋十六步半也。車上立視遠，不過此有所敬而式則目不得過馬尾。馬尾近車闌也。左右視曰顧，不得過轂。轂在車兩旁，顧過轂則掩後人之私也。車入國中不馳，則不用鞭策。韋策末也。卹撫摩也。以策韋撫恤其馬，勿令疾驅垂鞭信步，塵不揚出軌外也。鄭以勿字連上讀作沒鑿也。凡國君乘車遇大祭之牛，必式過宗廟，必下。下牛式廟，文誤也。路馬，君馬駕路車者。人臣或效駕，或乘副車，必朝服致敬也。載鞭策，載而不用也。不敢使僕授已綏，自奮衣上也不敢曠左。左，左必式也。步路馬，謂君出牽馬以駕，或君歸稅駕。

禮記通解 卷一終
也必中道不行邊側也路馬所食車以足蹴踏之是
蔑視乘與也齒謂問馬之年齒馬老則晏駕故忌之
誅謂譴罰按此類秦世諸侯貴倨之禮先王無是也